

Piremõ

Pauru remikusiwarerà

Piremõ pewarà

Imovyvya

Aã kareta Janejare'e 'Āg omotekokuwa Pauru tokusiwa Piremõ pè maekwerà. Korosu taa wānà tè maevo Piremõ. Jesu koty rewarà kō atyry mō rōvijā rōmō ekoi. A'e pè Pauru kareta okusiwa ojimorypa Onesimu pewarà mō. Piremõ remīgwai temipyykwerà tè Onesimu. A'e ojawa oo oōvijā Piremõ wyi mijā. Ajaire Pauru wesa. Pauru omoe Jesu rewarà rē. Ajaate Jesu koty rewarà rōmō Onesimu ekoipa ky'y. Opyta jē rā'i Pauru pyri ipātavōarà rōmō iko. Ajaire Pauru, “Ejivy eo nerōvijā gyty”, e'i ijupe (Prm. 1.12). Aã kareta rē Pauru okusiwa tōvijā pè imonotà upi. “Age'e sōsi awyje neremīgwai e'eay rōmō ekoiitā ky'y, ojivy nekoty oo remē”, e'i ikusiwa imono upi (Prm. 1.15).

Pauru ojikuwa Piremõ pè

¹Pauru tè ije. Eayvukwerà akusiwatà neupe, Piremõ. Kiristu Jesu ayvu amojenu wyi emopā'ā kupa. Ajawyi jimopā'āga pupe wyi akusiwa kareta ajupa. Timoteu, janeretārā vo māl'ē, epyri tui akusiwa ajupa remē.

Kee a'e ene. Akuwa Jesu remīgwai rōmō tè ene neiko, Piremõ. Āwitō ore oroiko, āwīvo ve ene neiko. ²Āmō, Jesu koty rewarà kō pè ve akusiwa ajupa, neretā wryy pè ojimoaty Janejare'e moe'ea rē ipi mae kō pè. Āmō, janekōjā, janeretārā e'e vo māl'ē pè teve akusiwa ajupa, a'e Apia eu ijupe māl'ē pè. Āmō, Akipu pè akusiwa ajupa. Nojirokyjei Jesu remīgwai rōmō māl'ē Akipu. Mokojejō peupe akusiwa ajupa.

³Janeruwasu ikō tapenereko katu okatuaya rupi ipi nē. Tapepy'amopiryvypy katu ikō ipi nē. Āmō, Janerōvijā Jesu Kiristu reve ikō ta'evō penereko nē.

“Nejikuwa poroauvay mã'ẽ rômõ ene”, e'i mã'ẽ

⁴Janejare'e pè aporegeta neupewarà mō ipi remẽ, kee a'e ijupe ipi: “Ikatuay wete nekoty rewarà rômõ Piremõ ekoi. Ikatu neinõ neãkarã rômõ”, a'e ijupe ipi.

⁵Ãmõ kō manyvo neiko mã'ẽ omojenu ije ipi. Kee e'i ije kupa:
– Jõvijã wasu Jesu rè ojirovija katu mã'ẽ tẽ Piremõ. Poroauvay ipi. Jesu koty rewarà kō pirujẽ wauvay ipi, e'i ije kupa ipi.

[Ajawyi aepe nerewarà aenu remẽ, eroryvay enu nere.] ⁶Ãmẽ ajipy'amogeta nere remẽ, kee a'e Janejare'e pè: “Papa, emotekokuwaoka Piremõ ereko ipi. A'evoa Kiristu rupi neremime'ẽ ikatuay wete mã'ẽ okuwa katutã Piremõ ipi ky'y”, a'e Janejare'e pè neupewarà mō ipi.

⁷Eroryvay nere ipi, poroauvay mã'ẽ ene rewarà mō. A'evõ neiko mã'ẽ rè aja'a remẽ, ajimokasioka ywete ipi. Pirujẽ Janejare'e koty rewarà kō ve nemokasioka ywete nerekoa rupi ipi.

Pauru oporanu Onesimu pewarà mō remẽwarà

⁸⁻⁹Ije eka'akuwa ky'y. Age'e aã kareta akusiwa ajupa. Ije, Kiristu Jesu remipyteporo e'e teipe sō ije ijayvu mojenuarà rômõ mijã. Temimopã'ãgwerà rômõ teipe sō teve ije ijayvu mojenua rewarà mō mijã. Ajawyi eayvukasi kuwa neupe mijã. Ajamã'ẽ napotai eayvukasi rômõ, oroauvay rewarà mō. Ikatusa rupi tẽ a'etã ene. ¹⁰Kee a'etã ene. Onesimu pewarà mō akusiwa ajupa, neremĩgwai neremipykwerà pewarà mō.^a Era'yre'e vo Onesimu ky'y, Jesu Kiristu koty rewarà rômõ ekoi ky'y rewarà mō. Jimopã'ãga pupe aju remẽ, [Jesu rekoa rè amotekokuwa ipi. Ajaire “aje” e'i ky'y. “Ajawyi awyje Jesu rupi taiko ky'y”, e'i oupe ky'y. Ajawyi era'yre'e vo ky'y.] ¹¹Kwee remẽ nepyri ekoi jẽ remẽ, nikatu ywe'ei neupe mijã. Nanerovija ywe'ei ipi mijã. Ajamã'ẽ ojimoteepa ky'y. Ererovija katu ky'y. Awĩvo ve nererovija katu tevetã ky'y.

¹²Ajawyi age'e amojivyta nekoty ky'y. Aekarayta amono nekoty remẽ. ¹³Ike Jesu Kiristu ayvu rewarà mō jimopã'ãga pè aju remẽ, Onesimu epãtavõ gatu ipi. Ajawyi amomyta kuwa ipe epyri mijã, nerekovijarerã rômõ. ¹⁴Ajamã'ẽ “tamomyta jẽ” na'ei ijupewarà mō, neremĩgwai tẽ rewarà mō. Ajamã'ẽ nemuu mijẽ sō ekoty remẽ, eroryvayta ee ky'y. “Hoõ” nere'i remẽ, ikatu teve eupe.

¹⁵Maevõ Janejare'e tẽ omoisyryoka rã'ĩ newyi, [Jesu rekoa tokuwa rã'ĩ.] Age'e sōsi awyje neremĩgwai e'ey rômõ ekoitã ky'y, ojivy nekoty oo remẽ. ¹⁶Ajamã'ẽ neremĩgwai kōrijõ tẽ rōwã ky'y. Neretãrã e'e vo mã'ẽ teve ky'y, Jesu koty rewarà rômõ nevo ky'y rewarà mō. Aje aauvay. Akuwa ovãe nepyri remẽ, neau tevetã. Awitõ neremĩgwai e'ey rômõtã ky'y,

^a 1.10 Oposiko karuaru oõvijã pè mã'ẽ. Karai kō *escravo* e'i apijarã pè.

ãwĩvo ve neretãrã e'elay vo rômõ tevetã. Ajawyi akuwa neautã mã'ẽ tẽ ãwĩ.

¹⁷Ajawyi, ãwitõ ije tẽ avãe nepyri remẽ neroryvaytã, erevewarã tẽ ene rewarã mõ. Tãwĩvo ve tanerory ee ojivy nekoty oo remẽ. ¹⁸Ãmõ, nekarakuri rovaja sõ noepyme'ẽive remẽ, ere ije ãmẽ. Ije tẽ aepyme'ẽmatã ijupewarã mõ ene ãmẽ. Ãmõ, ni'ei sõ nerereko remẽ, ere teve ije. Ije tẽ apãsarõtã ãmẽ a'evoa, a'evo ekoi remẽ. Ije tẽ amokatutã ãmẽ. ¹⁹Aje, ije Pauru tẽ oromoepytã Onesimu rekovijarã pẽ, a'e ene. Eremikusiwarerã ywete ãwĩ. Ajawyi, "Aje sipõ omoepytã ije", tere e'ã eupewarã mõ. Ije tẽ Jesu rewarã rẽ oromotekokuwa, ãwisõ tekoua pyau nopa'ãi mã'ẽ rômõ tereiko upi katu ky'y. A'e rẽ nerepyme'ẽive maevo sõ tite ije. "Hoõ" tere eayvu pẽ ãmẽ. ²⁰Nereke'yry vo sõ mã'ẽ tẽ ije, Kiristu koty rewarã rômõ. Ajawyi a'e ene. Terejimory Onesimu rẽ ojivy oo nekoty remẽ, a'e ene. Janerõvijã ywete rewarã mõ terejimory ee, a'e teve. A'evo nereko remẽ, eroryvaytã nere ãmẽ. Ajawyi a'evo neiko remẽ, epy'amoryokatã rejupa.

²¹Akuwa aã kareta eremikusiwarerã rupi nereko katutã Onesimu. Eayvukwerã nerovijatã. A'evoa akuwapa. Akuwa eremiporanukwerã wyi erereko katutã.

²²Ãmõ, kee a'etã ene. Maevo aatã neresã ky'y, emoẽoka kupa paire. Akuwa peja'a jẽ ere ipi. Akuwa Janejare'e pẽ peporegetã eupewarã mõ ipi. Ajawyi emoẽoka mã'ẽ 'arã aãrõ jẽ ajupa. Emoẽoka kupa remẽ tẽ katu aatã pekoty ky'y. Ajawyi emokatu amãtejẽ ekea'ypa rã, a'e ene.

Kareta moawyjepaa

²³Ejimorypa Parasi^b epyri tui, jimopã'ãga pẽ. Kiristu Jesu rekoa rewarã mõ teve agyvo oroku orokupa. A'e opota ojimory nere eremikusiwarerã rupi. ²⁴Ãmõ, ereve oposiko mãe kõ ve opota ojimory nere. Kejõ. Maku. Ãmõ, Aritaku. Ãmõ, Temasi. Ãmõ, Rukasi. Mokocejõ opota ojimory nere mãe kõ.

²⁵Jõvijã wasu Jesu Kiristu ikõ tapenereko katu okatuaya rupi ky'y nẽ. [Awyjepã eremikusiwarerã ky'y.]

^b 1.23 Krs. 1.7-8; 4.12-13